

কালমৃগয়া

প্রথম দৃশ্য

তপোবন

ঋষিকুমারের প্রবেশ

বেলা যে চলে যায়, ডুবিল রবি।
ছায়ায় ঢেকেছে ঘন অটবী।
কোথা সে লীলা গেল কোথায়।
লীলা, লীলা, খেলাবি আয় ॥

লীলার প্রবেশ

লীলা। ও ভাই, দেখে যা, কত ফুল তুলেছি।
ঋষিকুমার। তুই আয় রে কাছে আয়,
আমি তোরে সাজিয়ে দি—
তোর হাতে মৃগাল-বালা,
তোর কানে চাঁপার দুলা,
তোর মাথায় বেলের সিন্ধি,
তোর খোঁপায় বকুল ফুল ॥

লীলা। ও দেখবি রে ভাই, আয় রে ছুটে,
মোদের বকুল গাছে
রাশি রাশি হাসির মতো
ফুল কত ফুটেছে।
কত গাছের তলায় ছড়াছড়ি
গড়াগড়ি যায়—
ও ভাই, সাবধানেতে আয় রে হেথা,
দিস নে দ'লে পায় ॥

লীলা। কাল সকালে উঠব মোরা,
যাব নদীর কূলে।
শিব গড়িয়ে করব পূজো,
আনব কুসুম তুলে।
ঋষিকুমার। মোরা ভোরের বেলা গাঁথব মালা,
দুলব সে দোলায়।
বাজিয়ে বাঁশি গান গাহিব
বকুলের তলায়।

লীলা। না ভাই, কাল সকালে মায়ের কাছে

নিয়ে যাব ধরে—
মা বলেছে ঋষির সাজে
সাজিয়ে দেবে তোরে।
সন্ধ্যা হয়ে এল যে ভাই,
এখন যাই ফিরে—
একলা আছেন অন্ধ পিতা
আঁধার কুটীরে ॥

ঋষিকুমার।

দ্বিতীয় দৃশ্য

বন

বনদেবীগণ

প্রথম।

সন্মুখেতে বহিছে তটিনী,
দুটি তারা আকাশে ফুটিয়া।

দ্বিতীয়।

বায়ু বহে পরিমল লুটিয়া।

তৃতীয়।

সাঁঝের অধর হতে
ম্লান হাসি পড়িছে টুটিয়া ॥

চতুর্থ।

দিবস বিদায় চাহে,
সরযু বিলাপ গাহে,
সায়াহেরই রাঙা পায়ে
কেঁদে কেঁদে পড়িছে লুটিয়া ॥

সকলে।

এসো সবে এসো, সখী,
মোরা হেথা বসে থাকি—

প্রথম।

আকাশের পানে চেয়ে
জলদের খেলা দেখি।

সকলে।

আঁখি-’পরে তারাগুলি
একে একে উঠিবে ফুটিয়া ॥

সকলে।

ফুলে ফুলে ঢ’লে ঢ’লে বহে কিবা মৃদু বায়।
তটিনী হিল্লোল তুলে কল্লোলে চলিয়া যায়।
পিক কিবা কুঞ্জে কুঞ্জে কুহু কুহু কুহু গায়,
কী জানি কিসেরই লাগি প্রাণ করে হায়-হায় ॥

প্রথম।

নেহারো, লো সহচরী,
কানন আঁধার করি
ওই দেখো বিভাবরী আসিছে।

দ্বিতীয়।

দিগন্ত ছাইয়া
শ্যাম মেঘরাশি থরে থরে ভাসিছে।

তৃতীয়। আয়, সখী, এই বেলা
মাধবী মালতী বেলা
রাশি রাশি ফুটাইয়ে কানন করি আলা।
চতুর্থ। ওই দেখো নলিনী উথলিত সরসে
অফুট মুকুলমুখী মৃদু মৃদু হাসিছে।
সকলে। আসিবে ঋষিকুমার কুসুমচয়নে,
ফুটায় রাখিয়া দিব তারি তরে সযতনে।
নিচু নিচু শাখাতে ফোটে যেন ফুলগুলি,
কচি হাত বাড়াইয়ে পায় যেন কাছে ॥

তৃতীয় দৃশ্য

কুটীর

অন্ধ ঋষি ও ঋষিকুমার

বেদপাঠ

অগ্নিরক্ষোদরঃ কোশো ভূমিবুধো ন জীযতি দিশোহস্য স্তস্তয়ো দ্যৌরস্যোত্তরং
বিলং স এষ কোশোবসুধানস্তম্বিন্ বিশ্বমিদং শ্রিতম্ ॥
তস্য প্রাচী দিগ্ জুহুর্নাম সহমানা নাম দক্ষিণা রাজী নাম প্রতীচী সুভূতা
নামোদীচী তাসাং বায়ুর্বৎসঃ স য এতমেবং বায়ুং দিশাং বৎসং বেদ ন
পুত্র রোদং রোদিতি সোহহমেতমেবং বায়ুং দিশাং বৎসং বেদ মা পুত্ররোদং বৃদম্ ॥

অন্ধ ঋষি। জল এনে দে, রে বাছা, তৃষিত কাতরে।
শুকায়েছে কণ্ঠ তালু, কথা নাহি সরে ॥

মেঘগর্জন

না, না, কাজ নাই, যেয়ো না বাছা—
গভীরা রজনী ঘোর, ঘন গরজে—
তুই যে এ অশ্বের নয়নতারা।
আর কে আমার আছে!
কেহ নাই— কেহ নাই—
তুই শুধু রয়েছিস হৃদয় জুড়িয়ে।
তোরেও কি হারাব বাছা রে—
সে তো প্রাণে স'বে না ॥

ঋষিকুমার। আমা-তরে অকারণে, ওগো পিতা, ভেবো না।
অদূরে সরযু বহে, দূরে যাব না।
পথ যে সরল অতি,
চপলা দিতেছে জ্যোতি—
তবে কেন, পিতা, মিছে ভাবনা।

অদূরে সরযু বহে, দূরে যাব না।

প্রস্থান

চতুর্থ দৃশ্য

বন

বনদেবতা

সঘন ঘন ছাইল গগন ঘনাইয়া,
স্তিমিত দশ দিশি,
স্তম্ভিত কানন,
সব চরাচর আকুল—
কী হবে কে জানে
ঘোরা রজনী,
দিকললনা ভয়বিভলা ॥
চমকে চমকে সহসা দিক উজলি
চকিতে চকিতে মাতি ছুটিল বিজলী
থরথর চরাচর পলকে ঝলকিয়া।
ঘোর তিমিরে ছায় গগন মেদিনী
গুরু গুরু নীরদগরজনে
স্তম্ভ আঁধার ঘুমাইছে,
সহসা উঠিল জেগে প্রচণ্ড সমীরণ,
কড় কড় বাজ ॥

প্রস্থান

বনদেবীগণের প্রবেশ

সকলে। ঝন্ ঝন্ ঘন ঘন রে বরষে।
দ্বিতীয়। গগনে ঘনঘটা, শিহরে তরুলতা—
তৃতীয়। ময়ূর ময়ূরী নাচিছে হরষে।
সকলে। দিশি দিশি সচকিত, দামিনী চমকিত—
প্রথম। চমকি উঠিছে হরিণী তরাসে ॥
সকলে। আয় লো সজনী, সবে মিলে—
ঝর ঝর বারিধারা,
মৃদু মৃদু গুরু গুরু গর্জন—
এ বরষা-দিনে
হাতে হাতে ধরি ধরি

গাব মোরা লতিকা-দোলায় দুলে।

প্রথম। ফুটাব যতনে কেতকী কদম্ব অগণন—

দ্বিতীয়। মাখাব বরন ফুলে ফুলে।

তৃতীয়। পিয়াব নবীন সলিল, পিয়াসিত তরুলাতা—

চতুর্থ। লতিকা বাঁধিব গাছে তুলে।

প্রথম। বনেরে সাজায়ে দিব, গাঁথিব মুকুতাকণা,
পল্লবশ্যামদুকূলে।

দ্বিতীয়। নাচিব, সখী, সবে নবঘন-উৎসবে
বিকচ বকুলতরু-মূলে ॥

ঋষিকুমারের প্রবেশ

ঋষিকুমার। কী ঘোর নিশীথ, নীরব ধরা,
পথ যে কোথায় দেখা নাহি যায়,
জড়ায়ে যায় চরণে লতাপাতা।
যাই, স্বরা ক'রে যেতে হবে
সরযুতটিনীতীরে—

কোথায় সে পথ।

ওই কল কল রব—

আহা, তৃষিত জনক মম,

যাই তবে যাই স্বরা।

বনদেবীগণ। এই ঘোর আঁধার, কোথা রে যাস্!

ফিরিয়ে যা, তরাসে প্রাণ কাঁপে।

স্নেহের পুতুলি তুই,

কোথা যাবি একা এ নিশীথে—

কী জানি কী হবে,

বনে হবি পথহারা।

ঋষিকুমার। না, কোরো না মানা, যাব স্বরা।

পিতা আমার কাতর তৃষায়,

যেতেছি তাই সরযুনদীতীরে ॥

বনদেবীগণ। মানা না মানিলি, তবুও চলিলি—

কী জানি কী ঘটে।

অমঞ্জল হেন প্রাণে জাগে কেন—

থেকে থেকে যেন প্রাণ কেঁদে ওঠে।

রাখ রে কথা রাখ, বারি আনা থাক—

যা, ঘরে যা ছুটে।

অয়ি দিগ্গজনে, রেখো গো যতনে
অভয় স্নেহছায়ায়।
অয়ি বিভাবরী, রাখো বুকো ধরি
ভয় অপহরি রাখো এ জনায়।
এ যে শিশুমতি, বন ঘোর অতি—
এ যে একেলা অসহায় ॥

পঞ্চম দৃশ্য

শিকারীগণের প্রবেশ

বনে বনে সবে মিলে চলো হো!
চলো হো!
ছুটে আয়, শিকারে কে রে যাবি আয়।
এমন রজনী বহে যায় যে।
ধনুর্বাণ বল্লম লয়ে হাতে
আয় আয় আয়, আয় রে।
বাজা শিঙা ঘন ঘন—
শব্দে কাঁপবে বন,
আকাশ ফেটে যাবে,
চমকাবে পশু পাখি সবে,
ছুটে যাবে কাননে কাননে,
চারি দিকে ঘিরে যাব পিছে পিছে।
হোঃ হোঃ হোঃ হোঃ ॥

দশরথের প্রবেশ

শিকারীগণ।

জয়তি জয় জয় রাজন, বন্দি তোমারে—
কে আছে তোমা-সমান।
ত্রিভুবন কাঁপে তোমার প্রতাপে,
তোমারে করি প্রণাম ॥

শিকারীদের প্রতি

দশরথ।

গহনে গহনে যা রে তোরা—
নিশি বহে যায় যে।
তন্ন তন্ন করি অরণ্য
করী বরাহ খোঁজ্ গে!
এই বেলা যা রে।

নিশাচর পশু সবে
এখনি বাহির হবে—
ধনুর্বাণ নে রে হাতে, চল্ স্বরা চল্।
জ্বালায়ে মশাল-আলো
এই বেলা আয় রে ॥

প্রস্থান

প্রথম শিকারী। চল্ চল্ ভাই,
স্বরা করে মোরা আগে যাই।
দ্বিতীয়। প্রাণপণ খোঁজ্ এ বন, সে বন!
তৃতীয়। চল্ মোরা ক'জন ও দিকে যাই।
প্রথম। না না ভাই, কাজ নাই।
হোথা কিছু নাই— কিছু নাই—
ওই ঝোপে যদি কিছু পাই।
তৃতীয়। বরা বরা!
প্রথম। আরে দাঁড়া দাঁড়া,
অত ব্যস্ত হলে ফস্কাবে শিকার।
চুপি চুপি আয়, চুপি চুপি আয়
ওই অশথতলায়।
এবার ঠিকঠাক্ হয়ে সবে থাক্—
সাবধান ধরো বাণ—
সাবধান ছাড়ে বাণ।
দুই-তিন জন। গেল গেল, ওই ওই পালায় পালায়।
চল্ চল্—
ছোট্ রে পিছে, আয় রে স্বরা যাই ॥

প্রস্থান

বিদূষকের সভয়ে প্রবেশ

বিদূষক। প্রাণ নিয়ে তো সটকেছি রে,
ওরে বরা, করবি এখন কী।
বাবা রে!
আমি চুপ করে এই
আমড়াতলায় লুকিয়ে থাকি।
এই মরদের মুরদখানা,
দেখেও কি রে ভড়কালি না!

বাহবা! সাবাস তোরে—
সাবাস রে তোর ভরসা দেখি ॥
গরিব ব্রাহ্মণের ছেলে
ব্রাহ্মণীরে ঘরে ফেলে
কোথা এলেম এ ঘোর বনে—
মনে আশা ছিল মস্ত
চলবে ভালো দক্ষিণ হস্ত,
হা রে রে পোড়া কপাল,
তাও যে দেখি কেবল ফাঁকি ॥

শিকারীগণের প্রবেশ

শিকারীগণ।

ঠাকুরমশায় দেরি না সয়,
তোমার আশায় সবাই বসে
শিকারেতে হবে যেতে,
মিহি কোমর বাঁধো ক'ষে।
বন বাদাড় সব খেঁটেখুঁটে,
আমরা মরি খেটেখুটে,
তুমি কেবল লুটেপুটে
পেট পোরাবে ঠেসেঠুসে!

বিদুষক।

কাজ কি খেয়ে, তোফা আছি—
আমায় কেউ না খেলেই বাঁচি।
শিকার করতে যায় কে মরতে,
টুঁসিয়ে দেবে বরা-মোষে।
টুঁ খেয়ে তো পেট ভরে না—
সাধের পেটটি যাবে ফেঁসে ॥

হাসিতে হাসিতে
শিকারীগণের প্রস্থান

বিদুষক।

আঃ বেঁচেছি এখন।
শর্মা ও দিকে আর নন।
গোলেমালে ফাঁকতালে সটকেছি কেমন।
দেখে বরা'র দাঁতের পাটি
লেগেছিল দাঁত-কপাটি,
পড়ল খ'সে হাতের লাঠি কে জানে কখন—
আহা কে জানে কখন।

চুলগুলো সব ঘাড়ে খাড়া,
চক্ষুদুটো মশাল-পারা—
গোঁ-ভরে হেঁট-মুখে তাড়া কল্লে সে যখন—
রাস্তা দেখতে পাই নে চোখে,
পেটের মধ্যে হাত পা ঢোকে,
চুপ্‌সে গেল ফাঁপা ভুঁড়ি শঙ্কাতে তখন—
আহা শঙ্কাতে তখন ॥

প্রস্থান

শিকার স্বপ্নে

শিকারীগণের প্রবেশ

এনেছি মোরা এনেছি মোরা
রাশি রাশি শিকার।
করেছি ছারখার,
সব করেছি ছারখার।
বন-বাদাড় তোলপাড়
করেছি রে উজাড়।

গাইতে গাইতে প্রস্থান

বনদেবীগণের প্রবেশ

কে এল আজি এ ঘোর নিশীথে
সাধের কাননে শান্তি নাশিতে।
মত্ত করী যত পদ্মবন দলে
বিমল সরোবর মন্দিয়া,
ঘুমন্ত বিহগে কেন বধে রে
সঘনে খর শর সন্দিয়া।
তরাসে চমকিয়ে হরিণ হরিণী
স্থলিত চরণে ছুটিছে।
স্থলিত চরণে ছুটিছে কাননে,
করুণ নয়নে চাহিছে।
আকুল সরসী, সারস সারসী
শরবনে পশি কাঁদিছে।
তিমির দিগ ভরি ঘোর যামিনী
বিপদ-ঘনছায়া ছাইয়া—
কী জানি কী হবে আজি এ নিশীথে,
তরাসে প্রাণ ওঠে কাঁপিয়া ॥

প্রস্থান

দশরথের প্রবেশ

না জানি কোথা এলুম, এ যে ঘোর বন।
কোথা সে করীশিশু, কোথা লুকালো!
একে তো জটিল বন, তাহে আঁধার ঘন,
যাক্-না যাবে সে কত দূর, কত দূর—
যাব পিছে পিছে—
না না না না, ও কী শূনি!
ওই-সে সরযুতীরে করিছে সলিল পান—
শব্দ শূনি যে ওই, এই তবে ছাড়ি বাণ ॥

নেপথ্যে বনদেবীগণ

হায় কী হ'ল! হায় কী হ'ল!

বাণাহত ঋষিকুমারের নিকট দশরথের গমন

কী করিনু হায়!
এ তো নয় রে করীশিশু! ঋষির তনয়!
নিষ্ঠুর প্রখর বাণে বৃধিরে আশ্রিত কায়,
কার রে প্রাণের বাছা ধুলাতে লুটায়!
কী কুলগ্নে না জানি রে ধরিলাম বাণ,
কী মহাপাতকে কার বধিলাম প্রাণ!
দেবতা, অমৃতনীরে হারা প্রাণ দাও ফিরে,
নিয়ে যাও মায়ের কোলে মায়ের বাছায় ॥

মুখে জলসিঁচন

ঋষিকুমার।

কী দোষ করেছি তোমার,
কেন গো হানিলে বাণ!
একই বাণে বধিলে যে
দুটি অভাগার প্রাণ।
শিশু বনচারী আমি,
কিছুই নাহিক জানি,
ফল মূল তুলে আনি—
করি সামবেদ গান।
জন্মান্ধ জনক মম
তৃষায় কাতর হয়ে

রয়েছেন পথ চেয়ে—
কখন যাব বারি লয়ে।
মরণান্তে নিয়ে যেয়ো,
এ দেহ তাঁর কোলে দিয়ো—
দেখো, দেখো, ভুলো নাকো,
কোরো তাঁরে বারি দান।
মার্জনা করিবেন পিতা—
তাঁর যে দয়ার প্রাণ ॥

মৃত্যু
ষষ্ঠ দৃশ্য
কুটীর
অন্ধ ঋষি

আমার প্রাণ যে ব্যাকুল হয়েছে,
হা তাত, একবার আয় রে।
ঘোরা রজনী, একাকী,
কোথা রহিলে এ সময়ে!
প্রাণ যে চমকে মেঘগরজনে,
কী হবে কে জানে ॥

লীলার প্রবেশ

লীলা।

বলো বলো, পিতা, কোথা সে গিয়েছে।
কোথা সে ভাইটি মম কোন্ কাননে,
কেন তাহারে নাহি হেরি!
খেলিবে সকালে আজ বলেছিল সে,
তবু কেন এখনো না এল।
বনে বনে ফিরি 'ভাই ভাই' করিয়ে,
কেন গো সাড়া পাই নে ॥

অন্ধ।

কে জানে কোথা সে!
প্রহর গণিয়া গণিয়া বিরলে
তারি লাগি ব'সে আছি
একা হেথা কুটীরদুয়ারে—
বাছা রে, এলি নে।
ধরা আয়, ধরা আয়, আয় রে,
জল আনিয়ে কাজ নাই—

তুই যে আমার পিপাসার জল।
 কেন রে জাগিছে মনে ভয়।
 কেন আজি তোরে হারাই-হারাই
 মনে হয় কে জানে ॥

লীলার প্রস্থান

মৃত দেহ লইয়া দশরথের
 প্রবেশ

অন্ধ।

এতক্ষণে বুঝি এলি রে!
 হৃদিমাঝে আয় রে, বাছা রে!
 কোথা ছিলি বনে এ ঘোর রাতে
 এ দুর্যোগে, অন্ধ পিতারে ভুলি।
 আছি সারানিশি হায় রে
 পথ চাহিয়ে, আছি ত্যায় কাতর—
 দে মুখে বারি! কাছে আয় রে ॥

দশরথ।

অজ্ঞানে করো হে ক্ষমা তাত, ধরি চরণে।
 কেমনে কহিব, শিহরি আতঙ্কে।
 আঁধারে সন্ধানি শর খরতর
 করীভ্রমে বধি তব পুত্রবর
 গ্রহদোষে পড়েছি পাপপঙ্কে ॥

দশরথ-কতৃক ঋষির নিকটে
 ঋষিকুমারের মৃতদেহ
 স্থাপন

অন্ধ।

কী বলিলে, কী শুনলাম, এ কি কভু হয়!
 এই-যে জল আনিবারে গেল সে সরযুতীরে—
 কার সাধ্য বধে, সে যে ঋষির তনয়।
 সুকুমার শিশু সে যে, স্নেহের বাছা রে—
 আছে কি নিষ্ঠুর কেহ বধিবে যে তারে!
 না না না, কোথা সে আছে, এনে দে আমার কাছে—
 সারা নিশি জেগে আছি, বিলম্ব না সয়।
 এখনো যে নিরুত্তর, নাহি প্রাণে ভয়!
 রে দুরাত্মা, কী করিলি—

অভিশাপ

পুত্রব্যসনজং দুঃখং যদেতন্মম সাংপ্রতম্
 এবং স্বং পুত্রশোকেন রাজন্ কালং করিষ্যসি ॥

দশরথ।

ক্ষমা করো মোরে, তাত— আমি যে পাতকী ঘোর
না জেনে হয়েছি দোষী, মার্জনা নাহি কি মোর।
সহে না যাতনা আর— শান্তি পাইব কোথায়।
তুমি কৃপা না করিলে নাহি যে কোনো উপায়।
আমি দীন হীন অতি— ক্ষম ক্ষম কাতরে,
প্রভু হে, করহ ত্রাণ এ পাপের পাথারে ॥

অশ্ব।

আহা, কেমনে বধিল তোরে!
তুই যে স্নেহের পুতলি, সকুমার শিশু ওরে।
বড়ে কি বেজেছে বুক! বাছা রে,
কোলে আয়, কোলে আয় একবার—
ধুলাতে কেন লুটায়! রাখিব বুক ক'রে ॥

কিয়ৎক্ষণ স্তম্ভভাবে অবস্থান ও অবশেষে

উঠিয়া দাঁড়াইয়া দশরথের প্রতি

শোক তাপ গেল দূরে,
মার্জনা করিনু তোরে ॥

পুত্রের প্রতি

যাও রে অনন্ত ধামে মোহ মায়া পাশরি—
দুঃখ আঁধার যেথা কিছুই নাহি।
জরা নাহি, মরণ নাহি, শোক নাহি যে লোকে—
কেবলই আনন্দস্রোত চলিছে প্রবাহি।
যাও রে অনন্ত ধামে, অমৃতনিকেতনে—
অমরগণ লইবে তোমা উদার-প্রাণে
দেব-ঋষি রাজ-ঋষি ব্রহ্ম-ঋষি যে লোকে
ধ্যানভরে গান করে একতানে—
যাও রে অনন্ত ধামে জ্যোতির্ময় আলয়ে
শুভ্র সেই চিরবিমল পুণ্য কিরণে—
যায় যেথা দানব্রত সত্যব্রত পুণ্যবান
যাও বৎস, যাও সেই দেবসদনে ॥

যবনিকাপতন

পুনরুত্থান

ঋষিকুমারের মৃতদেহ ঘেরিয়া বনদেবীদের গান

সকলই ফুরালো স্বপনপ্রায়!
কোথা সে লুকালো, কোথা সে হায়।
কুসুমকানন হয়েছে ম্লান,
পাখিরা কেন রে গাহে না গান—
ও সব হেরি শূন্যময়— কোথা সে হায়!
কাহার তরে আর ফুটিবে ফুল,
মাধবী মালতী কেঁদে আকুল।
সেই যে আসিত তুলিতে জল,
সেই যে আসিত পাড়িতে ফল,
ও সে আর আসিবে না— কোথা সে হায়॥

যবনিকাপতন

প্র: অগ্রহায়ণ ১২৮৯ (1883)